



## Terenga 3: Hōtaka 38 - Mīhia ngā mahi a te tangata me te waiata Te Hatete O Te Reo

### He Mihi

E te wiri kōkō, e te wiri kākā, māpere mai ki runga ki ngā hau o te takiwā. Pakikau, kia tau. Matikara, kia mau, ki te peka o te rākau whakamarumaruru nei, o Ako.

### Hei Mahi Whakarongo

Kia noho tātou ki te whakarongo ki ngā kōrero i runga o Te Kāuta mō tēnei mea, mō te ngau tuarā.

- 1) Ko wai a runga?
- 2) Ka kōhimuhimuhia tēwhea momo tangata?
- 3) He aha te tapairu?

### He Whakamārama

Kei te tupu rā tā tātou rārangi kīanga hei whakamihī i ngā hua ka puta i te pukumahi o te tangata. Ki te whakawehea tō mihi kia toru ngā wāhanga, ka pēnei pea te āhua:

Kupu Whakarite	Te mahi i oti	Mihi
E te ringa kino	Mōu i whakaheke werawera.	Tēnā rā koe.
E te ringa whero	Mou i tū hei ārahi i te iwi.	Ka nui te mihi ki a koe.
E te ringa rehe	Mōu i whakapau kaha ki te whakairo i te whare nei.	Kāore e ārikarika ngā mihi ki a koe.

He nui ngā taonga o te ao Māori hei kupu whakarite mō te tangata. He momo pounamu, he huruhuru manu, he otaota nō te ngahere, he whakakai, he mau taringa, he aha rānei. Anei ētehi hei rangahau māu: Kei taku...

koko tangiwai  
piki kōtuku  
mōtoi kahotea  
hei tawhiri  
kati taramea  
kuru pounamu

### Hei Mahi

Whakaarohia tētehi tangata hei mihi māu. He kaiako rānei, he kaitohutohu hākinakina rānei, ko ō mātua rānei, ko wai atu rānei. Tuhia mai tō mihi ki raro iho nei. Whāia te taura o runga ake nei, arā, kia toru ngā wāhanga. Me tīmata ki te kupu whakarite.

### He Taura:

He mihi tēnei ki taku kaiako reo Māori tuatahi i te kura takawaenga o Tokoroa, ki a Ian Christensen.

*E te kahika hītawetawe*

*mōu i hika i te ahi o te reo i roto i te whatumanawa*

*tēnā rā koe i tō taura mai*

*tēnā rā koe i tō aroha ki ngā taonga puipuiaki a kui mā, a koro mā.*

## **Te Hatete o Te Reo**

nā ngā Ika-a-Whiro o Te Panekiretanga

14.2.09

E te akunga houhare  
tutungia te hatete o te reo  
kia kongange, kia pūkauri  
kei pūrēhua, ka piroku, ka kewa

Ko te kanaku whitawhita  
o Kōingo, o Nako  
me ngiha!

Ponitakatia kia pūāhuru te noho  
"Taku ahi tūtata, taku mata kikoha"

Ko te kanaku whitawhita  
o Kōingo, o Nako  
me ngiha!

Ponitakatia kia pūāhuru te noho  
"Taku ahi tūtata, taku mata kikoha"

Kei pūrēhua, ka piroku  
kia kongange, kia pūkauri  
tutungia te hatete o te reo!

**"Taku ahi tūtata, taku mata kikoha  
te kanaku whitawhita o te reo e...hi!"**

